

# Тұнған тарих иесі

Торғай тарихында орны тұр, Алматылы Орекен.

Елге істеген еңбегі,  
Ұзын, ұзақ жол екен.

Ілімі мен білімі,  
Бойында толған ғибрат.

Тағылымды салт-дәстүр,  
Жастарға берер мол екен!

Өлкеміздің ақын-жазушыларын өскелең ұрпаққа танытып, насихаттау мақсатында Арқалық қаласындағы облыстық № 2 әмбебап ғылыми кітапханасының әдістеме-библиография бөлімі тарихшы, шежіреші, абыз қария, еңбек ардагері Орекен Алматылының туғанына 85 жыл толуына орай «Тұнған тарих иесі» атты жаднаманың тұсаукесерін өткізді.

Іс-шараға Орекен Алматылының қарындасы Тыныштық Алматықызы, Арқалық қаласының құрметті азаматы, өлкетанушы Шөптібай Байділдаұлы, Арқалық қалалық ардагерлер кеңесінің төрағасы, ардагер-ұстаз Жәнібек Ғапбасұлы, Орекен Алматылының баласы Нұрхафиз Орекенұлы, келіні Сәуле Ахметқызы және Н. Құлжанова атындағы Торғай гуманитарлық колледжінің студенттері қатысты. Іс-шара барысында, қонақтарымыз Орекен Алматылы

туралы көптеген естеліктерімен бөлісіп, Нұрхафиз Орекенұлы әкеге деген сағынышын әнмен жеткізді.

Жаднама бірнеше бөлімдерден тұрады. 1-бөлімінде «Арқаның Алатауы еді...» (Орекен Алматылының өмірбаяны), 2-бөлімінде «Сұңғыла ойдың егесі» (Орекен Алматылы шығармалары, мерзімді басылымдарға жарияланған мақалалар тізімі), 3-бөлімінде «Өмірінің жарқын бейнесі» (фото суреттер), 4-бөлімінде Орекен Алматылы жайлы жылы лебіздер, 5-бөлімінде «Арнаулар» топтастырылған.

Торғайдың арда ұлдарының бірі, тума талант Орекен Алматылы ортамызда болса, биыл қыркүйек айының 17 жұлдызында 85 жасқа келер еді.

Екі жыл бұрын ортамызда ақылын айтып, еліне қамқор болып жүрген аға туралы өткен шақпен еске алып әңгімелеу қандай ауыр еді. Өлке тұлғаларын уақытылы жастарға насихаттау, кейінгі ұрпаққа үлгі болар Орекен Алматылының өмірі мен атқарған еңбегінен сыр шертіп, қазақ жастарына үлгі ету, қалың оқырман қауымға насихаттау біздің міндетіміз.

Орекен Алматылы қазақ әдебиетін қадірлеп өскен, соның жанашыры болған азамат. Өз өмірінде Нұрхан Ахметбеков, Сырбай Мәуленов, Ғафу Қайырбеков, Шәміл Мұхамеджанов сияқты елдің атақты азаматарымен дәмдес болды, солардың тәрбиесін көрді. Торғайдың небір саңылақтары туралы әңгіме қозғағанда арқасы ұстап, ұзаққа шабатын керемет шешендік өнері де бар еді.

Заманның біртуары, елдің абыз ақсақалы, тарихын тереңнен тартатын қарт Торғайдың алтын терегінің бірі, Орекен ағаның бейнесі ұлттық әдебиет пен мәдениетті, оның тарихын қастерлейтін Тобыл-Торғай өңірі халқының жадында мәңгілік сақталатынына сенімдімін. Артына қалдырып кеткен өнегесімен, айтып кеткен ұлағатты әңгімесімен, көптің көңілінде ұзақ сақталатын шежіресімен елдің аңыз етіп айтып жүретін аяулы тұлғасына айналды. Орекен Алматылының есімі елдің жүрегінде мәңгі сақталады.

**Әсем АХМЕТЖАНОВА,**  
Әдістеме-библиография  
бөлімінің меңгерушісі.